



Senin, 22 Pebruari 2021

Ogen: Kolose 1:15-17



'Ikon' Dibata



Ikon eme tampilen alu bentuk symbol ntaħ pe gambar si nuriken kerna sada sada hal. I bas kegeluhenta erbage-bage ikon si erbahansa menukah kita nginget kerna sie. Kenca sitatap simbol ntaħ gambarna minter siinget pesan si nuate ibabana. Umpamana, ibas android siipake kita tep-tep wari pe erbage-bage gambar sijadi ikon sada produk alu bage la perlu melala ntaħ gedang penjelasan siarus siisehkenna gelah iangka pemakaina ntaħ pe singidahsa. Kepeken kai pe si lit ibas doni enda megati iwakili erbage-bage 'ikon' gambar ntaħ pe simbol. Renungenta paksa enda nuriken surat si isehken rasul Paulus man perpulungen Kolose, paksa e erbage-bage pengajaren si papak reh ku bas perpulungen. Janah pengajaren e mbelin ipengaruhi agama-agama bagepe budaya si lit paksa e. Pengajaren kerna kuasa Kristus iperjelas Paulus guna ngelawan pengajaren si turah e. Arah teks si jadi ogenta paksa enda, kai si isuratken Paulus e desken sada pengakun kiniteken si she kal jilena. Iturikenna maka Jesus eme gambar Dibata si la teridah, sintua ibas kerina si ijadiken Dibata. Alu bage si ituriken maka manusia eme tempas Dibata ngatakenca maka manusia itepa rikut ras tempas Kristus, i bas Kristus dengen guna Kristus. Alu bage erkiteken Kristus eme 'ikon' Dibata maka la lit nari dalam manusia ndarat ntaħ pe nggeluh i luar Kristus.

Arah kai si ituriken Paulus i bas pengajarenna ngajuk kalak si tek maka Kristus tuhu-tuhu erkuasa nandangi si lit i doni enda janah IA ngenca ngasup nelamatkan kerina si nggeluh sabap sie kerina ijadiken arah Kuasa Dibata. Arah Kristus me manusia banci nandai Dibata. Ibas Kristus me manusia selamat. Alu bage ula kal sempat kita nggeluh i darat Kristus, tetaplak tatap, usih dengen nggeluh i bas IA.